



Na sjednici uredničkog odbora časopisa TECHNO SCIENCE dana 12.02.2026. godine,
Urednički odbor donosi:

ETIČKI KODEKS ČASOPISA TECHNOSCIENCE

1. OPŠTE INFORMACIJE

Etički kodeks časopisa Techno Science (u daljnjem tekstu: Etički kodeks) utvrđuje moralna načela i principe profesionalne etike kojih su se dužni pridržavati autori, recenzenti, urednik i članovi uredničkog odbora.

Etički kodeks sadrži odredbe koje se odnose na plagiranje, fingiranje i krivotvorenje rezultata, neovlašteno prepisivanje te druge oblike naučnih falsifikata.

Svrha Etičkog kodeksa jeste promovisanje etičkog ponašanja i moralnih vrijednosti u oblasti tehničkih i srodnih disciplina, te afirmacija profesionalnih standarda koji su obavezujući za sve učesnike u procesu pripreme i objavljivanja časopisa.

2. INFORMACIJE ZA AUTORE

Dostavljeni rukopisi moraju biti originalni radovi autora. Autori su obavezni istinito i precizno predstaviti rezultate i zaključke svog istraživanja.

Slanjem rada autori potvrđuju da rukopis ne krši autorska prava trećih strana te se obavezuju obavijestiti izdavača o eventualnom kršenju prava. Radi lakše distribucije i osiguranja odgovarajućih prava korištenja, autorska prava na objavljene radove pripadaju izdavaču, osim ako nije drugačije ugovoreno.

Istraživačka povreda nanosi štetu naučnom znanju i može usmjeriti daljnja istraživanja u pogrešnom pravcu. Može se pojaviti u različitim oblicima:

- **Krivotvorenje podataka** – fingiranje rezultata i njihovo prikazivanje kao stvarnih.
- **Manipulacija podacima** – izmjena, selektivno prikazivanje ili izostavljanje podataka radi postizanja željenog rezultata.
- **Plagijat** – preuzimanje tuđih ideja, tekstova ili rezultata bez odgovarajućeg navođenja izvora.



- **Drugi oblici povrede** – lažno predstavljanje interesa, kršenje povjerljivosti, zloupotreba istraživačkih materijala, kao i pokušaji zataškavanja povrede ili represija prema osobama koje na nju ukažu.

Svi pojedinci koji su dali značajan doprinos u kreiranju radu trebaju biti navedeni kao koautori. Ostali saradnici trebaju biti adekvatno spomenuti. Rad mora sadržavati potpunu i tačnu listu institucionalnih pripadnosti svih autora, uključujući akademske i korporativne pripadnosti.

Reprodukcija teksta iz drugih radova bez odgovarajućeg navođenja izvora (plagijat), kao i objavljivanje radova gotovo identičnog sadržaja od istih autora (samoplagijat), nije prihvatljivo. Svaki oblik plagiranja smatra se ozbiljnom povredom Etičkog kodeksa.

Neetično je istovremeno dostavljati isti ili suštinski sličan rad u više časopisa. Ovo uključuje radove zasnovane na istim podacima bez značajnih razlika u sadržaju. Izuzetak su revidirane i značajno izmijenjene verzije rada.

Fingiranje, manipulacija ili krivotvorenje podataka predstavlja ozbiljno kršenje izdavačke etike. Autori ne smiju predstavljati tuđe rezultate kao vlastite.

Autori su dužni priznati rad drugih istraživača koji je utjecao na njihovo istraživanje te navesti relevantne publikacije. Citirati treba isključivo radove koji su direktno povezani s temom istraživanja. Nerelevantne reference, uključujući pretjerano samocitiranje radi povećanja broja citata, smatraju se neetičkim.

Primarna odgovornost za rješavanje slučajeva istraživačke povrede leži na institucijama koje zapošljavaju autore. Ukoliko je primjenjivo, povreda se prijavljuje uredniku, koji će zatražiti mišljenje recenzenata i uredničkog odbora. Ako se povreda potvrdi, poduzimaju se odgovarajuće mjere: objava ispravke ili povlačenje rada, privremena zabrana razmatranja novih radova autora, te, po potrebi, obavještanje drugih časopisa.

Autor ima pravo podnijeti prigovor na uredničku odluku o radu.



3. INFORMACIJE, ODGOVORNOSTI I DUŽNOSTI UREDNIKA

Glavni i odgovorni urednik dužan je osigurati:

- Odgovornost za urednički sadržaj časopisa, uključujući izbor tema i kvalitet objavljenih radova.
- Kontinuirano unapređenje kvaliteta časopisa i zadovoljavanje potreba autora i čitatelja.
- Slobodu akademskog izražavanja i očuvanje integriteta naučne publikacije.
- Izbjegavanje poslovnih utjecaja koji bi mogli kompromitirati intelektualne standarde.
- Objavljivanje ispravki, pojašnjenja, opoziva i izvinjenja kada je to potrebno.
- Transparentnost u vezi s finansiranjem istraživanja i ulogom donatora.
- Jasne i dostupne upute autorima i recenzentima.

Odluke o prihvatanju ili odbijanju rada zasnivaju se na naučnoj vrijednosti, originalnosti, jasnoći i relevantnosti rada za područje časopisa.

Urednik je dužan:

- Objasniti autorima razloge prihvatanja ili odbijanja rada.
- Donijeti konačnu odluku u slučaju oprečnih mišljenja recenzenata.
- Ne mijenjati odluku o prihvatanju rada osim u slučaju ozbiljnih problema.
- Odbiti rad koji je vraćen bez traženih izmjena.
- U slučaju ponovnog razmatranja odbijenog rada, uključiti nove recenzente.

Odbijanje rada može se zasnivati na metodološkim nedostacima, nedostatku originalnosti, nedovoljnoj relevantnosti ili povredi Etičkog kodeksa.

4. INFORMACIJE, ODGOVORNOSTI I DUŽNOSTI RECENZENATA

Recenzenti su dužni:

- Procjenjivati rad objektivno i nepristrasno.
- Izbjegavati sukob interesa u vezi s autorima, institucijama ili finansijerima istraživanja.
- Ukazati na relevantne objavljene radove koji nisu citirani.
- Tretirati rukopise kao povjerljive dokumente.
- Ne dijeliti rukopis bez izričite dozvole urednika.
- Dostaviti recenziju u roku od tri sedmice od prihvatanja zadatka.
- Obavijestiti urednika o eventualnim povredama Etičkog kodeksa.
- Davati konstruktivne i pristojne primjedbe autorima.



UNIVERZITET U TRAVNIKU
FAKULTET ZA TEHNIČKE STUDIJE

Aleja konzula br. 5, 72270 Travnik
Bosna i Hercegovina
Tel/Fax: +387 30 540 876
E-mail: info@fts.ba www.fts.ba

Urednik može odlučiti da ne proslijedi autorima neprimjerene ili uvredljive komentare recenzenata.

Recenzenti ne smiju koristiti podatke iz rukopisa u vlastite istraživačke svrhe prije njegovog objavljivanja.

Travnik, 12.02.2026. godine.

UREDNIČKI ODBOR

Doc.dr.sci. Elvedin Bečić, predsjednik